

每週經課朗誦經文 (巴克禮漢羅/教羅) 2011/10/09

共同經課-1 出埃及記三十二章一節~十四節

1 百姓看見摩西延 chhiân 無落山，百姓就聚集到亞倫 hia，對伊講，起來，kā阮妝上帝，thang 行 tī阮 ê 頭前；因為 hit-ê 摩西，就是 chhoā阮 tù 埃及地出來，hit-ê 人，阮 m̄知伊 tú-tioh 甚麼。 2 亞倫對 in 講：Lín ê bó，lín ê kiáⁿ，cha-bó-kiáⁿ，耳 á 所掛 ê 金環，pak 伊，theh 來 hō 我。 3 百姓就 lóng pak in 耳 á 裡 ê 金環，theh 來 hyrh 亞倫。 4 亞倫 tù in ê 手接來，鑄一隻牛 á，用 chhiám 刀 á 雕刻伊；in 就講：以色列 ah，這是你 ê 上帝，chhoā 你出埃及地 ê。 5 亞倫看了，就 tī 牛 á ê 面前起壇；亞倫 koh 宣布講：明 á 日 tioh 守節服事耶和華。 6 隔日清早，in 起來，獻燒祭 kap 平安祭；百姓就坐 teh lim 食，起來 kún 笑。 7 耶和華對摩西講：去 ah，你落去；因為你 ê 百姓，就是 tù 埃及地 chhoā 出來 ê，已經敗壞家己。 8 In 緊緊離開我所吩咐 in ê 路，為家己鑄成一隻牛 á，跪拜伊，獻祭伊，講：以色列 ah，這就是 chhoā 你出埃及地 ê 上帝。 9 耶和華對摩西講：我看 chit-ê 百姓，看 ah，是頷頸硬 ê 百姓。 10 你 taⁿ chhut-chāi 我，我 beh 大受氣 in，滅無 in；用你成做大國。 11 摩西就對伊 ê 上帝耶和華求情講：耶和華 ah，你啥事大受氣你 ê 百姓 ah，是你用大氣力大權能 ê 手，tù 埃及地 chhoā 出來 ê？ 12 啥事 hō 埃及人有話講：伊 chhoā in 出去，是 beh 害 in，害死 in tī 山中，tù 地上除滅 in？求你回心轉(trng)意，soah 你 ê 大受氣，無降災禍 hō 你 ê 百姓。 13 記念你 ê 奴僕亞伯拉罕、以撒、以色列，你 bat kí 家己對 in chiù-choā 講：我 beh hō lín ê 後裔親像天頂 ê 星 hiah-choē；koh 我所講 chit-ê 全地，我 beh 賞賜 lín ê 後裔，beh 做 in 永遠 ê 業。 14 Tùi án-ni，耶和華退悔，無降落伊前所講 ê 災禍，hō 伊 ê 百姓。

共同經課-2 詩篇一百零六篇一節~六節，十九節~二十三節

1 Lín tioh o-ló 耶和華。Lín tioh 感謝耶和華；因為伊是好；伊 ê 慈愛永遠 tī-teh。 2 Chī-chūi 能講起耶和華 ê 大權能？Chī-chūi 能表明伊一切 ê 名聲？ 3 見若遵守公平，常常行公義 ê；Chit 號人就有福氣。 4 耶和華 ah，你用恩惠款待你 ê 百姓，求你亦用這記念我；用你 ê 救恩臨到我。 5 Hō 我看見你揀 ê 百姓 ê 福氣，歡喜你 ê 國 ê 快樂，Kap 你 ê 產業相 kap 榮光。 6 阮 kap 阮 ê 祖公平犯罪，阮作孽，行 pháin。 19 In tī Hō-liat 造牛 á，仆拜所鑄 ê 像。 20 Án-ni 將 in ê 榮光，換做食草 ê 牛 á siōng。 21 Boē 記得救 in ê 上帝，Bat 行大 ê tai-chi tī 埃及-ê； 22 行奇事 tī 含地，行 thang 驚 ê 事 tī 紅海。 23 所以伊講 beh 滅無 in，若 m̄是有伊所揀 ê 摩西，當決裂 ê 時，khia 伊 ê 面前，挽回伊 ê 受氣，驚了伊滅無 in。

共同經課-3 腓立比書四章一節~九節

1 所以我所疼所欣慕 ê 兄弟，做我 ê 歡喜，做我 ê 冕旒 ê，所疼 ê ah，tioh án-ni khia 在 tī 主。 2 我勸 Iú-o-tia，koh 勸 Sùn-to-ki，tioh 同心 tī 主。 3 Koh 真 ê 同伴 ah，我也求你幫贊 chit 兩個婦人人，因為 in bat kap 我同出力 tī 福音，也 kap Kek-lī-bián，以及其餘 kap 我同 tioh 磨 ê，in ê 名記 tī 活命 ê 冊。 4 Tioh 常常 tiàm-tī 主來歡喜；我 beh koh 講伊，tioh 歡喜。 5 Lín ê 純良 tioh 對眾人顯明。主近 lah。 6 一概莫得掛慮；獨獨萬事 tioh 用祈禱懇求 kap 感謝，將 lín 所求 ê 排列 tī 上帝； 7 就上帝 ê 平安，poān 過一切人所想會到 ê，beh tī 基督耶穌保守 lín ê 心，lín ê 念頭。 8 Taⁿ 兄弟 ah，結尾來講，見若真實 ê，見若可敬 ê，見若公義 ê，見若清潔 ê，見若 thang 疼 ê，見若好名聲 ê，若有甚麼德行，甚麼 thang o-ló，chiah-ê lín tioh siàu 念。 9 Lín tù 我所學習，所領受，所聽見，所看見 ê，lóng tioh 行伊；就賞賜平安 ê 上帝 beh kap lín tī-teh。

共同經課-4 馬太福音二十二章一節~十四節

1 耶穌應伊，koh 用譬喻 kā in 講， 2 天國比並人君，kā 伊 ê Kiáⁿ 備辦婚姻 ê 筵席。 3 差伊 ê 奴僕召所請 ê 來赴筵席；但是 in m̄來。 4 Koh 差別個奴僕講，去 kā 所請 ê 講，我 ê 桌已經備辦便，我 ê 牛 kap 肥 ê cheng-siⁿ 已經 thài，百項物 lóng 便，tioh 來赴筵席。 5 In 無要緊，做 in 去；一個去伊 ê 田園，一個去伊 ê seng-lí 場； 6 其餘 ê 掠伊 ê 奴僕，凌辱 in，thài in。 7 人君受氣，差伊 ê 軍兵剿滅 hiah-ê 凶犯，續燒 in ê 城。 8 就 kā 伊 ê 奴僕講，婚姻 ê 筵席已經便，若是所請 ê boē 堪得。 9 所以 lín 去大路頭，見若所 tú-tioh ê lóng 請伊來赴筵席。 10 Hiah-ê 奴僕出去路裡，聚集凡所 tú-tioh ê，無論好 pháin；婚姻 ê 客廳人客就滿。 11 人君入去看人客，看見 tī hia 一人無穿禮服； 12 kā 伊講，朋友 ah，你無穿婚姻 ê 禮服，怎樣入來 chia？伊就靜靜。 13 Hit 時人君 kā chiah-ê 差用講，縛伊 ê 腳手，將伊 hiat tī 外面烏暗 ê 所在；tī hia beh 有啼哭咬牙切齒。 14 因為受召 ê choē，受揀 ê 少。